

Rakan sekampung bersyukur Pak Lah pilih teman hidup

BH-7/6/2007

Oleh Faiza Zainudin

KEPALA BATAS: Berita Perdana Menteri, Datuk Seri Abdullah Ahmad Badawi akan berkahwin Sabtu ini di Putrajaya, disambut penuh kegembiraan dan kesyukuran penduduk kampung kelahirannya, di sini.

Kebanyakan penduduk mengalu-alukan berita baik itu dan mereka mendoakan kebahagiaan pasangan itu.


Seorang teman rapat Perdana Menteri, Datuk Arshad Zakaria, berkata sudah sampai masanya Abdullah berkahwin memandangkan kehidupannya yang sibuk memerlukan teman untuk meluahkan perasaan.

"Saya tidak terkejut mendengar berita itu di media massa, memang benar, beliau akan berkahwin. Cuma sebelum ini, kami tidak tahu dengan siapa, kami pun tidak bertanya. Bagaimanapun, kami terima berita ini dengan gembira dan rasa seronok," katanya ketika ditemui, di Masjid Jamiul al-Badawi di sini, semalam.

Beliau yang berkawan rapat dengan Abdullah sejak kecil berkata, pihaknya akan mengadakan mesyuarat dengan jawatankuasa masjid itu, esok.

"Mungkin kami akan membuat surat ucapan tahniah kepadanya serta mendoakan kedua-duanya," katanya.

Seorang lagi rakan Abdullah, Datuk Abdul Rahim Bakar, 81, ketika ditemui di Kampung Ber-



Abdul Rahim

tam, di sini, gembira mendengar berita itu.

"Memang bagus Pak Lah berkahwin lagi, ada orang yang dapat menemaninya pada masa dia susah dan senang," katanya.

Isterinya, Datin Habsah Bakar, 75, juga gembira mendengar pengumuman perkahwinan Perdana Menteri.

"Kami hendak tanya dia (pasal kahwin) sebelum ini, tidak berani, kini gembira dengan keputusannya itu," katanya yang mendengar berita itu menerusi televisyen.

Seorang pembantu eksekutif Yayasan Tekun Nasional di Bertam, Nazirah Ishak, 25, mendoakan kebahagiaan Abdullah hingga ke akhir hayat.

"Pah Lah seorang pemimpin yang baik dan kami semua sayangkannya, dan gembira dengan pilihannya itu," katanya.